

84-боб. Ходимни аъробийга сотиб юбориш



18:30 / 20.04.2020 2628

Амрадан ривоят қилинади:

«Оиша розияллоҳу анҳо чўрисига: «Вафот этсам, озодсан», деди. Сўнг Оиша бемор бўлиб қолди.

Шунда акасининг ўғиллари асли суданлик табибдан сўрашди. У:

«Сизлар сеҳрланган аёл ҳақида гапиряпсизлар. Уни чўриси сеҳрлаб қўйган», деди.

Оишага хабар етганда:

«Сен мени сеҳрладингми?!» деди.

«Ҳа», деди.

«Нима учун, абадий нажот топмагур?! – деди. Кейин: – Уни энг ёмон эгалик қиладиган арабларга сотиб юборинглар!» деди.

Оиша онамиз розияллоҳу анҳо ўз чўриларига вафотларидан кейин унинг озод бўлишини билдирдилар.

Қулдорликка қарши курашнинг йўлларида бири ҳам шу бўлган. Бунинг учун Ислому «мудаббар» деган усулни жорий қилган.

Хожанинг ўз қулларига «Вафот этсам, озодсан», деб тайинлаб қўйиши ҳам қул озод қилишнинг бир йўли бўлиб, савоби хожага тегади. Акс ҳолда қул мерос сифатида хожанинг болаларига ўтиб, қуллигича қолади.

Ислому ўша пайтдаги одамларни қулдан ҳам, савобдан ҳам маҳрум қилмаслик учун мана шу гўзал одатни йўлга қўйган. Бу ҳам Исломининг қулдорликка қарши олиб борган кураш йўлларида биридир.

Оиша онамиз розияллоҳу анҳо ҳам чўриларига «Вафот этсам, озодсан», деб қўйган эканлар.

Бир куни Оиша онамиз розияллоҳу анҳо бетоб бўлиб қолибдилар. Шунда у кишининг жиянлари, яъни акаларининг болалари бир табибни олиб келиб, кўрсатишибди. Табиб: «Бу аёл сеҳрланибди, уни ўзининг чўриси сеҳрлаб қўйибди», дебди. Табибнинг сўзларини Оиша онамизга етказишибди. Оиша онамиз чўрини чақириб: «Сен мени сеҳрладингми?» деб сўрабдилар. Чўри: «Ҳа», дебди. Сабабини сўрасалар, «Сиз вафот этсангиз, мен озод бўламан», деган жавобни олибдилар.

Шунда Оиша онамиз розияллоҳу анҳо: «Уни сотиб юборинглар. Сотганда ҳам, араблардан қўл остидагиларга ёмон муомала қиладиган кишиларга сотинглар», деб айтган эканлар.

Оиша онамиз розияллоҳу анҳо чўрининг қилмишига яраша ўзлари унга ёмонлик қилмай, таъзирини ейиши учун уни қўл остидагиларга яхши муносабатда бўлмайдиган одамларга сотиб юборишни буюрган эканлар.

«Одоблар хазинаси» китобидан